



Sanaartornermut Ataatsimiititaliamut

Att.: Justus Hansen, Ataatsimiititaliami siulittaasoq
inatsisartut@ina.ala.gl

Inatsisartut Sanaartornermut Ataatsimiititaliaata akinik allannguinerup angalasunut aningaasaqarnikkut kingunerisassai pillugit apeqqutaanut UKA2025/171-imut aamma 172-imut akissut

Dato: 21-01-2026
Sagsnr.: 2025 - 18685
ID. nr.: 79615935

Aallarniutigalugu Sanaartornermut Ataatsimiititaliaq akinik allannguinerup angalasunut aningaasaqarnikkut kingunerisassai pillugit apeqqutaanut UKA2025/171-imut aamma 172-imut itiliisoqarnissaanik qinnuteqarneranut qutsavigaara. Ataatsimiititaliap angalasunut pissutsit ingerlatseqatigiiffiullu ingerlanera pillugu ataatsimut paasiniaasoqarnissaa kissaatigaa, matumalu kinguliani ataatsimiititaliap tamatumunnga apeqqutai allanneqarput, akissummik malitseqartinneqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

1. Arctic Umiag Line: Umiarsuaq nutaanngilisoq, siunissamilu iliuusissat nalornisigineqarput. Umiarsuaq pillugu pilersaarutit pillugit ataatsimiititaliaq ilisimatinneqarnissaminik kissaateqarpoq.

Akissut: Sarfaq Ittuk-p ukiuni tulliuuttuni atuuffigisamini killissaa qanilliarorpaa. Taamaattumik Naalakkersuisut siunissami aaqqiissutaasinnaasunik ilaasunillu angallassinermi siunnerfissanik qulaajaallutik suliamik aallartitsipput. Tamatuma saniatigut Naalakkersuisut mittarfiit nutaat sanaartorneqartut sunniutissaat pingaarnerit aammalu ilaasunik assartuussinermut sunniutissat paasisaqarfigineqarnissaat utaqqivaat, Naalakkersuisut taamaalillutik ilaasunik angallassinermi suliniutinik naleqqunnerpaanik aallartitsisinnaaniassammata.

2. Naatsorsuutigineqartut amigartooruteqarnerujussuarmut Air Greenlandi nammineq sipaarniuteqarfissatut periarfissanik nammineq nassaarsinnaava?

Akissut: Apeqqutip akissuteqarfiginissaanut Air Greenland A/S oqaaseqartinneqarpoq. Air Greenland A/S imatut paasissutissiivoq:

"Air Greenland ukiup affaani siullermi aningaasaqarnikkut artorsangaatsiarpoq, ilaatigut pisarnermit silarlungaatsiarnerunera, Nuup Mittarfiani unammillernartoqarnera ataatsimullu isigalugu pisinnaasat atornerqarnerisa appasinnerat peqqutaallutik ukioq 2025 tamakkerlugu akileraannginnermi 30 MDKK-t missaannik amigartooruteqarnissaaq naatsorsuutigineqarmat. Taamatuk ukiumut naatsorsuutit inernerisaannut naatsorsuutigisaqarnermut pilersaarutit malillugit angallassinnginnermut toqqaannartumik aningaasartuutaanerusut matussuserneqarnissaat ilaatinneqarput katillugit 140 MDDKK, tassalu ukioq 2024-mut naleqqiullutik 40%-inik qaffattussaallutik. Ajoraluartumik amigartoorutaasussat taakku amerlanersaat aamma piviusunnngorsimapput.

Ukiup affaani siullermi unammilligassarpasuit paasineqareernerini, aammalu pingaartumik Icelandair-imit aamma SAS-imit nutaamik annertunerusumillu unammillerneqalernissap ilimagineqalernerani Air Greenland suliniutinik, naatsorsuutit inernerinik pitsannguisussanik aallartitsivoq. Allanguinerit, ukiullu affaata aappaani silaginnerunera kissaatigineqartunut sunniuteqarsimavoq, maannalu ukioq 2025-mut naatsorsuutit ikinnerugaluartunik sinneqartoorfiusunilli inerneqarnissaat naatsorsuutigineqarpoq. Ukiutum naatsorsuutit inernerini naatsorsorneqaleruttorput, aammalu 2026-mi maajimi tamanut ammasumik saqqummiunneqarnissaat naatsorsuutigineqarluni.

Air Greenlandimiit ukiutum naatsorsuutit inernissaattut naatsorsuutigineqartut naammaginangitsutut isumaqarfigineqarput. Kisiannili avataaniit pissutsit amerlasuut, pingaartumillu Nuummi nutaamik mittarfittaarneq, silap allanggornera angallaviillu allanggornerat sulisut tungaanniit sulinerujussuarmik piunasaqarfiusimavoq, suliniutillu taakku naammaginartumik ingerlasimapput.

Air Greenland siunissami aningaasaliisarnerninik ingerlatsiinnarniarluni amerlanerusunik sinneqartoortarnissamik pisariaqartitsivoq, aalajangersimasumillu Air Greenland pigisanut nalilinnut, nunap iluani timmisartuussinernik ingerlatsiinnarniarluni, aammalu attaveqaasersuutit allanggornerisa kingunerisaannik ingerlatsiinnarniarluni 500 MDKK-nik aningaasaliisarpoq. Taakkununnga aningaasaliissutit akilernerqarsinnaassappata, siunissami amerlanerusunik sinneqartoortarnissaq qulakkeerneqartussaavoq.

Tamatuma peqatigisaanik ingerlatseqatigiiffik aaqqissuussaannermi arlalinni unammilligassaqarpoq:

- Mitterfiit nutaat sulisut amerlineqarnissaannik aamma isumannaallisaanermut piunasaqaatit sukannernerulersinneqarnerat pissutigalugu naammassisinnaasat ikinnerulernissaannik piunasaqaateqarfiupput.*
- Ataatsimut isigalugu kingoraartissanut nioqqutissanullu akit qaffangaatsiarput.*
- Nunami namminermi angallassinermut aningaasartuutit isorartunerusumik angallassisalerneq, maanna bilitsit akiisigut ersiuteqartinneqanngitsoq peqqutaallutik amerlipput.*
- Inuussutissarsiorfimmi akissarsiat qaffannerat timmisartortartunik mekanikerinillu pissarsiornermik ajornarnerulersitsipput.*
- Piffissani angallaviunerpaasuni unammillerneqarneq peqqutaalluni isertitassatigut artorsartoqarpoq. Air Greenlandip ukiuunerani sullissisarnera isertitaqarfiusanngilaq, isertitaqarnissamullu piffissani angallaviunerpaasuni sinneqartoorfiusumik tunisaqarnissaq apeqqutaavoq.*
- Piffissaq eqqorlugu angalasinnaannginnermut aningaasartuutit silarluttarnera, mitterfiit unammillerfiunerat teknikkikkullu unammilligassat peqqutaallutik amerliartorput, tassanilu Air Greenland aningaasartuutinik matussusiisarnissaq angalasinullu*

isumassuisarnissaq pillugu tunngaviusumik aalajangiisimavoq, naak kinguaattoornernut peqquataasartut ingerlatseqatigiiffiup nakkutigisinnaasaasa avataanikkaluartut.

Tamanna tunngavigalugu suliffeqarfiup iluani kiffartuussineq isumannaassuserlu eqqunngikkaluarlugit sipaaruteqarnissamut periarfissat killeqartuinnaapput. Sipaaruteqarfiusinnaasutuaq tassaavoq piffissamik eqquisinnaannginnermut atatillugu angalasut kiffartuunneqarnerinik annikillsitsinissaq, tamannali pissappat tunngaviusumik periusissiornikkut aalajangiisoqartariaqarpoq.”

3. Naalackersuisut naliliinerat malillugu Disko Line utoqqarnut pitsorluttunullu naapertuuttumik sullissiva?

Akissut: Apeqqutip akissuteqarfiginissaanut Peqqissutsimut Inunnullu Innarluutilinnut Naalackersuisoqarfik oqaaseqartinneqarpoq. Naalackersuisoqarfik ilaatigut imatut paasissutissiivoq:

”Ilaatigut innarluutillit peqatigiiffiisa ilaannit paasitinneqarpugut, innarluutilinnut assigiinngitsunut, ilaatigut tappiitsut isigiarsuttorujussuillu ukiui apeqqutaatinnagit naammaginartumik kiffartuussinissaq ajornakusoortoq. Disko Line inunnut innarluutilinnut, taakkunungalu utoqqaat pitsorluttullu ilanngullugit, naammaginartumik kiffartuussinersoq ilisimangilarput. Tamanna pillugu Diskoline-p nittartagaani allassimasoqanngilaq.

Inuit innarluutillit amerlasuutigut Tilioq, innarluutillit oqaaseqartartoqarfiat, saaffigisarpaat, aammalu kiffartuunneqarnerminni akimmisaarfiit naammattoortakkatik, inuit innarluuteqanngitsut naligalugit pineqarfigisinnaasatik erseqqissaatigisarlugit. Tilioq innuttaasut saaffiginnittarneri pillugit ukiumoortumik nalunaarusiamik saqqummiussisarpoq.”

Naalackersuisut apeqqummik malitseqartitseqqinnerminni suliaqartut attuumassutillit naliliinerinik ilanngussissapput, pisariaqartinneqartorlu naliliisoqarpat, Disko Line utoqqarnut pitsorluttunullu kiffartuussinera pillugu oqaloqatigissallugu.

4. Nordlandairimik timmisartuussinerit iluatsippat?

Akissut: Nordlandair Islandip aamma Nerlerit Inaata akornanni timmisartuussisarnermut Namminersorlutik Oqartussanut kiffartuussinissamut isumaqatigiissuteqarpoq. Sullissinerimi kiffartuussinissamut isumaqatigiissummi pissutsit tamarmik naammassineqarput.

Tamatuma saniatigut kiffartuussinissamut isumaqatigiissutip atuunnerani Naalackersuisut ingerlaavartumik ingerlalluurtumillu suleqatigineqarput, kiisalu Nordlandair pitsaasumik pilersitsiviusumillu oqaloqatigineqarluni.

Nordlandair nalunaaruteqarpoq, nassiussat amerlingaatsiarsimasut. Taamaattumik Naalackersuisoqarfimma Nordlandair pitsannguinnissamut suliniutini periarfissat pillugit suleqatigaa.

Aningaasanut inatsisissatut siunnersuummut tunngatillugu Air Greenlandip sorarninngornikut akikinnerusumik utoqqarnut angalasinnaaneri itisilerneqarnissaat kissaatigineqarpoq:

5. Akikillisaavigineqartarnerit qanoq annertutigisumik maannakkut atorineqartarpat?

Akissut: Apeqqutip akissuteqarfiginissaanut Air Greenland A/S oqaaseqartinneqarpoq. Air Greenland A/S imatut paasissutissiivoq:

"Kiffartuussinissamut isumaqatigiissuteqarfiusuni utoqqarnut +62-inik ukiulinnut aamma soraarnerussutisialinnut akikillisaatit atorineqarput.

Akikillisaatitallit taakku atorlugit angalanerit tunineqartut Kalaallit Nunaanni Naatsorsueqqissaartarfiup utoqqalinersiutilinnik kisitsinerani katillugit 4.207- it inuit 50 %-ii sinnilaarlugit amerlassuseqarput, tassani angalanerit agguaqatigiissillugit siumut/utimut angalanerini isorartussutsit marluk angallavigineqarsimanissaat apeqqutaatillugu. Angalasut neqeroorummik atuisimasut 90%-ii Kalaallit Nunaanneersuupput."

6. Atuisunut paasititsiniaaneq naammappa?

Akissut: Apeqqutip akissuteqarfiginissaanut Air Greenland A/S oqaaseqartinneqarpoq. Air Greenland A/S imatut paasissutissiivoq:

"Air Greenland naliliivoq, bilitsit, sumunnarfiit, atuisunik kiffartuussineq, angalanerit ataatsimoortut angalanissanullu neqeroorutit pillugit paasissutissat pissarsiarineqarsinnaasut naammattut. Paasissutissat taakku nittartakkami, inuit attaveqatigiittarfiini, tv-kkut radiukkullu pilerisaarutini, aammalu Air Greenlandimut sianerluni pissarsiarineqarsinnaapput.

Air Greenlandimiit attaveqatigiissinnaanermik pisariaqartitsineq ingerlaavartumik naliliiffigineqartarpoq, uterfigineqarnissartillu kissaatigalugu."

7. Utoqqaat angalanissaminnik inniminniinissaminnut sunik periarfissaqarpat? Internetikkuinnaq inniminniinissaq periarfissaava, imaluunniit angalatitsivikkut inniminniinissaminnut aamma periarfissaqarpat? Inuttut nammineq sullinneqarnermut akiligassinneqartarpat?

Akissut: Apeqqutip akissuteqarfiginissaanut Air Greenland A/S oqaaseqartinneqarpoq. Air Greenland A/S imatut paasissutissiivoq:

"Air Greenlandip nittartagaatigut angalatitsisullu allat isertarfiisigut, Club Timmisa-p app-iatigut imaluunniit Air Greenlandip sullitanut kiffartuussivianut +299 70 12 12-imut toqqaannartumik sianerluni angalanissanik kiffartuussinermut akitsuutitaqanngitsumik inniminniisoqarsinnaavoq.

*Aamma angalatitsivinnut, taakkunungalu ilanngullugu Greenland Travel-
imut ornigulluni angalanissanik inniminniisoqarsinnaavoq, taamatullu
kiffartuunneqarnermut nalinginnaasumik kiffartuussinermit
akitsuusiisoqartarpoq.”*

Neriuppunga ataatsimiititaliap matuma siuliani akissutikka naammaginatutut, aammalu
immikkoortut UKA2025/171-ip aamma UKA2025/172-ip oqaluuserineqarnerisa
suliarineqarnerisalu ingerlaqqinnissaannut naammattutut isumaqarfigissagai.

Inussiarnersumik inuulluaqqusillunga



Aqqaluaq B. Egede